

Den Cas di Cultura:

Homenahe na Festival Voz-i-Landia y na Aruba su Icono Musical Robert Jeand'Or

ORANJESTAD (AAN) – Recientemente a tuma lugar den Cas di Cultura, un anochi den cual a rindi homenahe e Festival Voz-i-Landia Escolar, cu presentacion tambe di e buki RELUCI, chispa musical cu ta relata e historia y memorianan di e Festival den su trayectoria di 1981-2015.

Tambe tabata tin homenahe na e musico Icono musical Arubano reconoci local y internacionalmente, sr. Robert Jeand'Or, y a presenta un documental di su desaroyo musical como musico-bahista, cantante, salsero, merengüero, tumbero y bolerista.

E tabata un show musical multidisciplinario cu baile, canto, presentacion di e buki y documental.

Logicamente por a disfruta di Robert y su Solo Banda Show, y di cantantenan manera Rachel Kraaijvanger, Shannon Bueno, Cesar Olarte, Edjean Semeleer, Javier Ras y Nelson Tromp, tambe Johnny Scharbaay & Friends a acompaña musicalmente, algun di e cantantenan.

Grupo Melodia bao guia di Rubin Ponson a deleita e publico



cu diferente cancion popular. E ballet Club di Movimiento a duna un tremendo show, bao guia di Samantha Westera.

E promotor cultural señor Mirto Lacle a expresa cu gradicimento pa e dos homenahenan menciona. El a splica cu e buki ta un homenahe colectivo pa tur e personanan cu a yega di participa den e Festival Voz-i-Landia Escolar como cantante pero tambe e maestro, e scol, e guia, e compositor, e arreglista, e bandanan, y tur e personanan entusiasta cu a yuda e festival bira un evento grandi.

El a expresa cu contrario na e expectativanan cu tabata tin, e sala tabata completamente yen. Incluso tabata tin degustamento di un biña pa cortesía di un agencia local, y tabata tin presencia di dos auto clasico y dos auto moderno, pa muestra riba transporte cu lo bira e tema di Festival di Buki 2019.

